



UKA 2018/38
7. november 2018
Aqqaluk Heilmann

Inuit inigisaminniit anisitaasarunnaarnissaat siunertaralugu Naalakkersuisut periusissiamik UPA2019-imi saqqummiussassamik suliaqaqqullugit peqquneqarnissaat Inatsisartut aalajangiiffigisassaattut siunnersuut.

(Inatsisartunut ilaasortaq Aqqaluaq B. Egede, Inuit Ataqtigiit)

Siunnersuuteqartoq isumaqatigilluinnarparput, nunatsinni iniminniit anisitaasartut ikilisariaqartut.

Atassummiit tunngaviusumik isumaqarpugut inuit namminneerlutik inuunertik akisussaaffigigaat, akiligassaqarunillu piffissaq eqqorlugu akilertartussaagaat. Tassaavorlu inunni ataasiakkaani kiffaanngissuseq pisussaaffiliisoq.

Taamaattorli inuit ilanngui, ilaqtariillu ilanngui pissuteqarlutik katataasinnaasarput akiliisinnaajunnaarnermik kingunilimmik. Tamanna iliuuseqarfigeqataassallugu peqataaffigerusupparput.

Qulakkeerneqassarli taakku akiliisinnaajunnaarsimallutik anisitaasussanngorsimappata, ilumut akiliisinnaasimagaluarlutik akisussaaffimmik qimatsiinnarsimasuussasut. Taamaattoqarsimappallu siunnersorneqarnissaminnik periarfissaqarnissaat Atassummiit taperserparput.

Massakkulli ukiuni marlunni Kommune Kujallermi misiliinermik ingerlataq, akiligassaqalersimasunut siunnersuisarnermik imalik naammasseqqaarnissaa utaqqimaarusupparput. Naak pitsaasumik angusaqarfiusutut oqaatigineqareeraluartoq, naammassillugu misiliutaareernissaa pingaartipparput. Paasissutissat tamakkiisut, misilittagaalersimasullu tamakkiisut tunngavigalugit aalajangertoqarnissaa, nunattalu sinneranut siunertamisut ingerlanneqalernissaa pingaartillugu.

Taamaammat suliaq asserpiaanik siunertalik ingerlareersoq qalliinnaqqunagu siunnersuut una Atassummiit itigartipparput.